

Instituzioek bi urtetan subentzioa erdira jeitsi diote ARGIAri,

13 milioitik 6.700.000ra. Zer inpresio sortzen dizu horrek?



MIKEL ATXAGA

(«Eguna»ko kazetaria)

Ez dakit oso zuzen zertan den dirulaguntzaren afera, baina badirudi Eusko Jaurlaritzatik ez ezik, Foru Aldunditik ere jasotzen zela dirulaguntza bat lehen. Orduan, Foru Aldundikoak laguntza hori banatzea debekaturik ote duten galdezten naiz.

Gusta ala ez gusta, ARGIAk erakusten du lan galanta egiten duela; adibidez, «Eguna»n baino lan gehiago somatzen dut hor. Beste aldizkari guztien zaku berberean ezin da sartu ARGIA dirua banatzeko orduan. Izan ere, ezin bait dira konparatu, alderdi horretatik tratamendu berezia behar luke ARGIAk. Badira hortik zenbait aldizkari, «Goiz Argi», «Saski-nasiki»... baina ez dakit hilik dauden edo, behintzat aldizkotasun irregularra dute. Beste batzuek berriz, «Elhuyar», «Jakín», «Susa» eta besteotan ikusten da lana, baina ezin dira ekiparatu ARGIArekin, zeren azken honen plantilla bat behar du, ezin da lagun batzuen artean soilik osatu.

«Hemen» eta «Eguna»k ARGIAren parean zer nolako aldeak duten ez dut garbi ikusten, nahiz eta hiruak asterokoak izan. Esate baterako ez dakit zer alde egongo den paperaren asuntuan, ARGIAk paper ederragoa du, kolorea ez du beti, baina komikiak e.a. koloretan dira, orriak, tamaina edota formatoak ezberdinak dira... kalkulak egin beharko lirakeke. ARGIAri tratamendu berezia eman behar zaiolako aldekoa naiz, irtenbide bat egon behar

du, tarteko soluzioren bat, ez dakit zergatik dagoen batzuen eta besteen arteko alde hori, zergatik batzuri horrenbeste eta beste batzueri ez. Demagun hoztasun handienakin hartu dutela erabaki hori. Hala ere emaitza ez da zuzena, koska handia dago.

«KORTATU» MUSIKA TALDEA

Interes handiarekin jarraitzen ari gara ARGIAren auzi hori. Eta inpresio ezin okerragoa jaso dugu Jaurlaritzakoengandik. Gutako zenbait euskaldun berriak gara, eta hori iruditzen zaigu, aldizkaria ia beti irakurtzen dugu eta jode! kristoren laguntza da, euskara oso erraza, behar beharrezkoa dugu. Baita ere esan, jesukristoren lana egiten ari direla ARGIAkoak, eta ez dutela merezi horrelako 'propina'rik. Maldizio bat baino gehiago bota dugu hau dela eta anaiok. Horrelako jokaerak ikusita ez du ematen laguntzeko prest daudenik Jaurlaritzakoak. Honetaz enteratu ginenean, piska bat komentatu eta lagunaren artean, opari gisa, harpidetzaren batzuk egitea erabaki genuen.

PAULO AGIRREBALTZATEGI (UZEIko partaidea)

Orain dela egun gutxi ETBn entzundako mahai-ingurua dut gogoan. Bazirudien hango partaidea guztiak bat zetozela militantziaren beharrez euskalgintzaren eta euskal kulturaren alorrean.

Edonork daki alor horretako militantziaren irudi eta eredu bihurtu direla ARGIAko langileak eta talde osoa. Militantzia organizatu, sutsu, burutsu eta 'profesional' horri esker hartzen dugu astero euskarazko astekari bikain hori. Eta bera bihurtu da, gainera, euskal egunkariaren proiekturako abiapunturik sendoena.

Militantzia, ordea, proiektu

eta ekintza kolektiboren baten helburuari buruz eraturiko taldeko lan modua.

Euskalgintza eta euskal kulturgintza, berriz, ez dira talderen baten helburua soilik, herri honen helburua dira: helburu publikoa, beraz. Eta militantzia da, hain zuzen, helburu horri begira euskararen eta euskal kulturaren alorrean diharduten indar herritarrek asmatu duten eratzeko, antolatzeko eta koordinatzeko bidea.

Euskararen aldeko militantzia herritarra, eta euskararen aldeko politika ofiziala ez dira elkarren aurkakoak, erlazio dialektikoa dute. Eta administrazio publikoak ez ditu horrelako erakunde herritarrak ez etsaitzat eta ez trabatatzat hartu behar. Hiru eginkizun dagozko administrazio publikoari euskalgintzan eta euskal kulturgintzan diharduten militantzi taldeen alde:

— Horien funtzioaren onarpen publikoa agertzea.

— Militantearen estatus soziala eta laborala aintzakotzat hartzea.

— Militantziaren lana sendotzea eta indartzea dirulaguntzen bidez.

Guzti horretatik ulertezina, onartezina eta susmo txarrekoa iruditzen zait ARGIAri laguntza murriztea, eta horretaraino murriztea, handitu eta zabaldu beharrean.

ARANTZAZU LOIDI (Bertsolaria)

Oso gaiztoa iruditzen zait egin dutena. Kontutan harturik gainera, diru iturri gehiegi ez dagoela herri honetan. Ez dago eskubiderik.

Konparaketak gorrotagarriak dira, baina «Hemen» eta «Eguna»rekin ez dago konparatzerik ARGIA, zer esanik ez gainerantzeko aldizkariekin. Erreportai eta elkarrizketak oso naturalak argitaratzen dira hor, euskara aldetik maila ona du, kazetaritza bultzada dator ARGIAtik...

Iruditzen zait Eusko Jaurlaritzaren kontraesan batzutan errotzen ari dela. Bestela, nola esplikatu aurrera eramaten ari den gabonetako euskaraz irakurtzeko kanpaina, beste alde batetik ARGIAkoen ilusioak zapuzten-efa ari bada? Nik uste estimazio gehiago zor zaiola horko militantzari, estimazioa gutxienik eta errekonozitu lan hori.




MARTIN IDIAKEZ

(Antzerki gizona)

Antzerki sailekook ere beti berdin gabilta administrazio-ko erakundeekin. Euskal Herria euskalduntzeko proiekturik ez daukate, eta jasaten ari garena horren ondorioa da. ARGIAri eta hainbat eta hainbat erakunde eta mogimendu herritarrei gertatu zaien ere proiektu eza horren ondorioa da. Beti badute aitzakiren bat erraztasunak mozteko, oztopoak jartzeko eta ezintasuna sortarazteko. Nahiz eta herritar mogimendu eta erakunde hauek jendea prest legokeen goiko erakundeekin bat eginik zenbait ekintza burutzeke.

ARGIAren arazoari lotuta, esan euskaldunok behar dugun aldizkari nazionalaren papera nahiko ondo betetzen ari dela. ARGIA izan litekeela biharko euskal egunkariak beharko dituen kazetarien prestataile eta trebatzailea. Zabaltasun estimagarriarekin ematen dira ARGIAren berriak, elkarrizketak... deskontsiderazio izugarria da egin zaiona ARGIAri. Ez-egiteko bat. Oinarrian zera frogatzen du, euskararekiko ajolagabekeria eta Euskal Herria euskalduntzeko proiektu eza nagusi dela Eusko Jaurlaritzan.



XABIER MENDIGUREN
(Itzultzailea)

Hasteko esango nuke gaizki egina iruditzen zaidala, eta hemen beti —edo aspaldidanik— ikusten den kontraesan bat ageri dela. Alde batetik esaten da behetik gora datozen iniziatibak indartu behar direla, eta gero praktikan ikusten dugu (beste zenbait gauzetan bezala honetan ere bai) ez dela horrela egiten, baizik eta goitik behera, eta askotan bizitza propiorik ez duten errealitateak sortzen dabilela Eusko Jaurlaritzara.

Behin baino gehiagotan salatu dut neronek aipaturiko kontraesan hau, azken batean antzeko gauza bat ikusi bait genuen guk geuk Itzultzaile Eskolarekin ere. Alde batetik, kilikolo zegoen hari indarra kendu zitzaion, eta gauza berri bat sortu da. Badakigu errealitate berri horrek zer eragozpen di-tuen. Eta gauza berbera gertatzen ari da kazetaritzaren munduan ere. Orduan, aurretik dauden errealitateak sendotu eta bultzatu ordez, beste batzu goitik behera bultzatze hori, nere eritziz, indarrak sakabana-tzea da... inposaketa bat. Azken batean sistema horrekin euskal kultura ezin da indartu. Aurretik dauden errealitate horiek indartu behar dira eta, behar denean, berriak sortu behar dira, osatzeko edota hedatzeko. Baina oso sistema eskasa iruditzen zait gaur egun era honetako indar banaketak egi-tea.

Eta hau alor batean baino gehiagotan gertatu da, iruditzen zait benetan kaltegarria dela euskal kulturaren etorki-zunerako.


JOSE ANTONIO LOIDI
(Idazlea)

Eusko Jaurlaritzak ARGIAri ematen dion dirulaguntza jeis-tea zer iruditzen zaidan? Oso gaizki. Izan ere Euskal Herriak egiaz euskaldunen herria iza-

ten jarraitu nahi badu euskara-ri eutsi beharko dio eta euste hori Jaurlaritzaren egiteko bat izango da.

Bestalde, begien aurrean da-go ARGIAk hainbeste urtetan euskarari egin dion mesedea. Baina batbateko erizpide hau sendotzeko eta arazo hau behar bezala epaitzeko Jaurlaritzakoek zer esaten duten jakin beharko nuke lehen. Egia bada aurreko urtetan ARGIAk dirulaguntza handiagoa jaso zuela eta bidezkoa dirudi jaso zuena mereziko zuela, aurten prezio guzien gorakada ikusirik, laguntza ere gehitu behar zela. Ez dute horrela egin eta gaizki dirudi, baina esan bezala eritzi on bat izateko denon arazoiak entzun beharko dira lehenbizi.

Nolanahi ere (egin den beza-la) egin behar ez dena honako edo halakori euskararen aurka-ko jokabidea leporatzea da. Nik ez dut uste Jaurlaritzako honako edo halako horiek, ez eta ARGIAkoak ere, euskaltza-leak ez direnik eta euskara maite ez dutenik. Horrela izan eta, ez al dago inongo diskrimi-naziorik gabe eta inongo eraso-rik gabe guztiok batera joate-rik?



MIKEL MENDIZABAL
(Bertsolaria)

Ez zait iruditzen dirulagun-tza horiek murrizteko arrazoa dirua bera denik. Eta diruaren arazoa ez bada ideologiaren barnean aurkitu beharko da arrazoa. Hala eta guztiz, eritziak eritzi, eta pentsamoldeak pentsamolde, edozein euskal instituzioek —eta kasu honetan Eusko Jaurlaritzara batek—, euskararen aldeko ahaleginak ba-bestu beharko lituzke; ulergaitza da laguntzak murriztea eus-kara hutsean borrokatzen den eta *aldizkari* bakarrenetakoa den ARGIAri. Esan nahi nuke baita ere euskal aldizkari hau ez bada bultzatzen eta babes-ten, nola arraio iritsiko gara Euskal Herriak behar duen eus-kal egunkaria eskuratzea?

DISKRIMINAZIOAREN AURREAN HERRIAREN LAGUNTZA

Harpidedun bakoitzak beste bat lortu

Diru-laguntzen murrizketak direla eta, kinka nahiko larrian jarri dute ARGIA. Ixteko arriskurik ez badago ere, aurreko urteetan eragindako hobekuntzak (gehiagarriak, orrialde-gehikuntzak, papera...) bertan behera gelditu daitezke. Hori dela eta, harpidedun andana berri bat egitea ezinbestekoa zaigu, larritasun berri honetatik ARGIA indartsu atera ahal izan dadin. Horregatik harpidedun bakoitzari, bere ingurukoren bat harpidetu dadin esfortzua egitea eskatzen diogu. Beheto txartela bidali eta ARGIAra bidali: Ametzagaña, 19 behea. 20012 DONOSTIA. Edo are errazago: telefonoz deitu (943) 28.33.99 edo 28.36.78 telefonoetara.



NIK ERE HARPIDEDUN IZAN NAHI DUT

IZEN-DEITURAK.....
HELBIDEA.....
HERRIA.....
TLFOA..... HERRIALDEA.....

KOBRAKETARAKO DATUAK

Bankua/Aurrezki Kutxa.....
Sukurtsala.....
Kontuaren zenbakia.....

ARGIA
Ametzagaña, 19 behea
20012 DONOSTIA
Tfnoa: (943) 28.33.99

